

每週經課朗誦經文(巴克禮台語漢字)2014/02/23

共同經課 - 1 利未記十九章一節~二節，九節~十八節

1 耶和華吩咐摩西講：2 「你著吩咐以色列全會對 in 講：恁著做聖，因為我耶和華——恁的上帝是聖。9 「恁收割田的五穀，田的角頭毋通割到盡，磕落的也毋通拾。10 葡萄園果子毋通挽了了，也毋通拾葡萄所落的果子；著留互喪鄉人及出外的。我是耶和華——恁的上帝。11 「恁毋通偷提，毋通欺騙，大家毋通講白賊。12 恁毋通指我的名濫糝咒誓，來褻瀆你的上帝的名，我就是耶和華。13 「毋通欺負你的厝邊，也毋通搶提伊的物。做工人的工錢，毋通留佇你遐歸暝到天光。14 毋通罵臭耳聾的，也毋通下塞礙的物佇睛暝人的面前，著敬畏你的上帝。我就是耶和華。15 「恁審判，毋通無公道；毋通偏袒喪鄉人，也毋通看重有勢力的人，著照公道審判你的厝邊。16 毋通佇你的百姓的中間四界行誹謗人，也毋通做干證愛害死你的厝邊。我就是耶和華。17 「你毋通心內怨恨你的兄弟；的確著責備你的厝邊，免得為著伊擔當罪。18 毋通報仇，也毋通埋怨你本國的百姓，著疼厝邊親像家己。我就是耶和華。

共同經課 - 2 詩篇一百一十九篇三十三節~四十節

33 耶和華啊，求你將你律例的路指示我，我欲徹底遵守！34 求你互我智慧，我就守你的律法，閣欲專心執守。35 求你互我行你誠命的路，因為此個路是我所歡喜的。36 求你互我的心向你干證的話，無向不義的錢財。37 求你互我的目矙越走無看虛假，閣互我佇你的路中來活。38 你的奴僕敬畏你，求你為伊堅固你的話！39 求你互我所驚的凌辱離開我，因為你的判詞是好。40 我欣慕你教示的話；求你佇你的公義互我來活！

共同經課 - 3 哥林多前書三章十節~十一節，十六節~二十三節

10 照上帝所賞賜我的恩，我親像智慧的師傅頭，有下地基，別人起佇彼頂面；總是逐人著謹慎怎樣起伊。11 因為所下的地基以外無人會下別個地基，地基就是耶穌基督。16 豈毋知恁是上帝的殿，上帝的神惦佇恁內面嗎？17 人若毀壞上帝的殿，上帝欲毀壞伊；因為上帝的殿是聖，殿就是恁諸個。18 人毋通家己騙。恁中間若有人掠家己佇此世間做有智慧，就著成做蠢，通成做有智慧。19 因為此世間的智慧，照上帝看是蠢。因為有記載講：「互諸個智慧的人，中 in 家己的詭譎的」；20 閣講：「主知有智慧的人的念頭是空空。」21 所以毋通將人來誇口，因為萬物是恁的。22 無論保羅、亞波羅、磯法、世界、活、死、現今的、將來的，攏是恁的；23 恁是基督的，基督是上帝的。

共同經課 - 4 馬太福音五章三十八節~四十八節

38 「恁曾聽見有話講：『目矙賠目矙，嘴齒賠嘴齒。』39 若是我給恁講，莫得及歹抵敵。若有人搨你正旁的嘴，倒旁的亦越互伊；40 有人愛告你，提你的內衫，外衫亦放互伊；41 有人勉強你行一里，就及伊行二里；42 對你求的，互伊；欲給你借的，莫得越走。」43 「恁曾聽見有話講：『著疼你的厝邊，怨恨你的對敵。』44 若是我給恁講，對敵恁的著疼 in，寤逐恁的著替 in 祈禱。45 互恁成做恁佇天裡的父的子；因為伊互伊的日起來照歹人及好人；亦用雨沃義及不義的人。46 因為恁若疼疼恁的，有甚麼報賞？許個抽餉者豈無按呢行嗎？47 恁干單請安恁的兄弟，有甚麼卡贏人？外邦人豈無按呢行嗎？48 所以，恁著純全，親像恁的天父的純全。」